

## País Invisible arrenhèc d'aufrir un dirècte de qualitat pendants era Corsa per Sa Lengua



Carta d'arregraïment dubèrta ath Collectiu Lengua Viua e toti les que mos an tengut era man ena escomesa.

Era còlha de [País Invisible](#), volem exprimir publicament eth nòste arregraïment mès corau e sincèr ath collectiu Lengua Viua e a tota era còlha qu'a organizat era 29au Corsa d'Aran per sa Lengua per totes es facilitats, era atencion e tot er amor que mos an dat e qu'an hèt possibla era cobertura en dirècte qu'auem hèt der eveniment qu'auèc lòc eth 30 de junhsèga passat.

Er amor damb eth qu'an organizat era corsa non sonque s'a materializat en succès d'enguan, damb recòrd de participacion e de samarretes venudes, mès tanben a estat clau entà que poguèssim retransmèter as nòsti auditors e espectadors era emocion e er esperit dera Corsa d'Aran per sa Lengua en [dirècte](#).

Profitam era escadença entà felicitar a Lengua Viua peth succès dera corsa. Sense dobte, era sua dedicacion e eth sòn trabalh en equipa an hèt possible aquest resultat impressionant.

**Volem tanplan exprimir eth nòste arregraïment** ar Ajuntament de Vielha, ar IEA-AALO, as tecnicians deth grop Nadau, as deth Malh Blanc e a toti es que mos an ajudat en tot prestar-mos ua taula, ues cagires, projectors e materiau tecnic.

Dempús d'auer amiat a tèrme [17 episodis](#) deth nòste pòdcast en estudi e de quauquì dirèctes sus es hilats sociaus, hèr per prumèr còp un platèu en dirècte ena plaça d'Aran ère **ua escomesa fòrça complicada que mos a costat ua grana preparacion**. Totun, sense era ajuda e er amor que mos a aufrit eth pòble aranés non auesse estat possible.

Gràcies per dar-mos era oportunitat de hèr part d'aquest gran eveniment e demoram auer era possibilitat de colaborar un aute viatge ena 30au edicion dera Corsa d'Aran per sa Lengua.